

(ciep geiz gonq)
Vunz dangdieg naeuz gij sing haenx dwg gij vunz youq giz dieg roen gutgoz ok saeh huxci dai bae haenx. Gangj daengz giz gutgoz neix, boux gangj maz cungj miz, gij goj de yied lwnh yied geizheih, yied gangj yied saenzgeiz, neix lainoix sawj bouxdingq sim diuq mbei dek, byoemgyaeuj daengj caez. Ndigah vunz dangdieg moix baez gvaq gizneix cungj dwg siujsim yupyup, hoeng, lij miz haujlai ci diegrog youq gizneix ok saehyak.

Ngoenzneix vunzmbanj dingqnyi sing “bunglwng bunglwng” yiengj, couh rox youh miz ci fan roengz dat bae lo, gyoengqde seiz dingz seiz swnj daeuj yawjyawj, gyoengq vunz gvaqluh haenx, hix seiz mbouj seiz dingz ci iet gyaeuj damqyawj. Aen ci fan roengz dat bae haenx, douci mbitniuj ndaej youqgaenj, hai mbouj ndaej, baengh gyoengq vunzmbanj bangfwngz, cij geuh ndaej ok fajdou. Song boux cungnienz ndaw ci baez ndonj ok ci daeuj, ndang unq ga saenz, laemx youq gwnz namh, saeknaj haumiek. Baenz moengj nanz cij hoizdauq yienzheiq, boux haici haenx naengbak saenzdedded cam lingh boux naeuz: “Lij gungh, mwngz mbouj miz saeh ba”?

“Sieng di naeng ndeu, mwngz ni?”

“Gou hix sieng di naeng ndeu, mbouj youqgaenj law.”

“Mwngz hai ci cibgeij bi, soqlaiz mbouj oksaeh gvaq, baezneix baenz-lawz……”

“Gou hix mbouj rox vih gijmaz, yaepyet couh bongh roengzbae lo, lumj naeuz miz nyup rengz ndeu rag gyaqci roengzbae nei.” Bouxhaici gangj sat doq najheu saepsat.

Vunzmbanj raen songde baenz-neix, doq humx gvaqbae, cici caca youh lwnh gij goj gvendaengz giz roen gutgoz neix, yied lwnh yied citgeiz, yied lwnh yied sawj vunz dwglau. Bouxhaici haenx dingq le byoem-gyaeuj dit, ndang hwnj manqgaeq bae.

Boux Lij gungh haenx dingq le bingzdingh dwk naeuz, raeuz bae yawjyawj najroen giz gutgoz haenx.

Songde doxrex benz daengz gwnz roen, boux Lij gungh yawj gwnz yawj laj, yawj swix ndomq gvaz, mizseiz bomq yawj, mizseiz ngengq yawj, lij



aeu diuz faexdwngx ndeu daeuj dag bae dag dauq ……

Ngoenz daihngeih, bouxdaeuz dangdieg gunghlugiz ciep ndaej dienhvah, cawz deng ndaq ciengz ndeu le, youh deng bik bae cawqleix gizdieg roen gutgoz haenx.

Yienzlaiz giz roen gutgoz haenx dwg roen bwzyouzlu gaeuqgeq, giek-daej roen loemq cauhaenz gizgoz mbiengjrog daemq mbiengjndaw sang, neix couh dwg famhgimq gij gisuz gveihfan najroen giz roen gutgoz haenx, hix couhdwg naeuz, famhgimq

gij yenzlij rengz ngengcohsim, gyoeb-baenz rengz ngengcohsim iq, rengz-lizsim daih.Youq gwnz cungj roen gutgoz neix hai ci, aenci suzdu aeu beij gveihfan roen gutgoz menh haujlai, ci cij mbouj bienliz gvejidau.

Giz dieg roen gutgoz “aeu hoenz” vunz haenx, ginggvaq dangdieg gunghlugiz cawqleix le, mbouj caiq ok saehyak lo. Seizgan baez nanz, gyoengqvunz hix ciemhciemh lumz aencoh giz dieg roen gutgoz “aeu hoenz” vunz haenx lo.

Boux heuh Lij gungh haenx, yenzlaiz dwg boux gauhgiz gungh-cwngzswh ndaw Gunghlugiz ndawsi ndeu, coh de dwg Lij Cauhgez, gyoengq doengzhangz de cungj heuh de guh Lij gungh.

Gvaq song bi le, diuz goengloh ngeihgaep gvangqlangh bingzbwd ndeu daeuj dingjlawh diuzroen bwz-youzlu gaeuqgeq haenx. Daj seizhaenx hwnj, gij goj gvendaengz gizdieg roen gutgoz “aeu hoenz” vunz haenx couh deng lizsij mad bae lo.

(caengz sat)

Sai: Danghnaeuz baenzde damz Fungh caeuq vuengz baenz doiq Saed yinghyungz fouzbeij Lumj ndaundeiq gwnzmbwn

Song boux raeuz doxcaeuq Aeu baenzciuh doengz ranz Danghnaeuz baenzde damz Fungh caeuq vuengz baenz doiq

Caemh dangq go faexcoengz Mbaw loeg daengx seiqgeiq Saed yinghyungz fouzbeij Lumj ndaundeiq gwnzmbwn

Mbwk: Roegrumz baengh diuzmae Cij ndaej yien hwnj mbwn Gaem gyaeuj mae ndaw fwngz Gou daengq mwngz gaej caeuq

Dangq gaeu unq cug rin Gou saed sim caen ndei Roegrumz baengh diuzmae Cij ndaej yien hwnj mbwn

Gaej buenq saenq buenq ngeiz Ciengzseiz ngeix ndaej hung Gaem gyaeuj mae ndaw fwngz Gou daengq mwngz gaej caeuq

Siengj Aeu Fwngz Bae Mbaet 想用手去摘

□Veiz Yingbcaiz/危英才

Sai: Seizgan gaenq loq gyang Raeuz camh damz daengz neix Siengj doxndei baenzseiq Muengh miz seiz caiq duengq

Biek mwngz sim mbouj sij Dangq ciznij Niuzlangz Seizgan gaenq loq gyang Raeuz camh damz daengz neix

Daengq vah raeuz gaej lumz Yaek caiq bungz baez ngeih Siengj doxndei baenzseiq Muengh miz seiz caiq duengq

Mbwk: Raeuz yaek siengj doxndei Ceij bau feiz mbouj laeuh Gou dem mwngz doxcaeuq Caezgya youq daengz dai

Ndaej gyau baenz baengzyoux Ngaeux gvej mbouj goenq sei

Raeuz yaek siengj doxndei Ceij bau feiz mbouj laeuh

Rumz fwn cungj caez dingx Haemz manh raeuz caez souh Gou dem mwngz doxcaeuq Caezgya youq daengz dai

Hab: Aeu fwen ma ganggoj Raeuz coj(cij) caez roxnaj Doxbiek yaek baema Caj ngoenz lawz caiq raen

Song raeuz sim doxgyaez Baezlaeng geiq ndaw hoz Aeu fwen ma ganggoj Raeuz coj caez roxnaj

Ngaeux raek sei cix lienz Rwi ciengz yaek douh va Doxbiek yaek baema Caj ngoenz lawz caiq raen

(sat)

Mauz Cwzdungh gangj gij vah baenzneix yiemzlig neix, biujmingz le de laemxsim ceihdingz hoenxdaeuq raixcaix. Gij vah de doiq onjdingh gwnzbiengz seizhaenx, gig youqgaenj.

Seizhaenx, Guengjsae song baij caeuq daih dingzlai ganbu vunzcungq cungj gig siengj vaiqdi ndaej hawj gwnzbiengz dauqcungz onjdingh caeuq swnghcanj cingqciengz. Hoeng, lai baez guh gvaq hong le, vanzlij miz di vunz ndeu hoenx hangz ndaej Roen Gaijfang Namzningz Si daengj gai caeuq diegyouqgaenj.

Ndaej Mauz Cwzdungh caeuq Couh Wnhlaiz cigsoh capfwngz le, daengz ndwen 8 ndawco, Namzningz gij saeh yiemzcungq doxdingj haenx cix ndaej dingzsat, dietloh Guengjsae caemh ndaej doengci dem. Gwnz-biengz Guengjsae gihbwnj ndaej onj-dingh.

Ndwen 8 ngoenz 23, Couh

Wnhlaiz daengj goengdaeuz ciepraen le sojmiz gij dungzci Guengjsae youq Ging camgya banhagsib haenx, senhbu cunghyangh le 《Gij Baevah Gvendaengz Laebbaenz Guengjsae Bouxcuengh Swcigih Gwzming Veijyenzvei Haenx》.

Ndwen 8 ngoenz 26, Guengjsae Bouxcuengh Swcigih Gwzming Veijyenzvei ndaej laebbaenz. Veiz Gozcingh guh cujyin, Couh Cifu, Vei Youcu, Ciuh Hungzgvangh, Ho Cwngzcungh, Anh Bingzswngh daengj

12 boux vunz guh fucujyin. Song baij cungj miz gij daibyauj doiqdaengj haenx ndaej guh vejyenz、cangzveij caeuq fucujyin.

“Vwnzgwz” ndaej song bi gij rumzrumz fwnfwn, Veiz Gozcingh cix lumj loqfangzhwnz nei. “Vwnzgwz” miz haujlai saeh de gamjdaengz geizheih, caemh goj lijgaij. Youq Baekging, miz baez ndeu, Couh Wnhlaiz iu de doxcaez naengh ci, de cix damz le di naemjap bonj-faenh, cungjljij naeuz: “Veiz Gozcingh

dungzci ha! Mwngz noix gij gingniemh sevei ho!” De dwg boux goengciengq hoenx ndaej geijcib bi ciengq haenx, dingj gvaq haujlai doxhoenx haemzhoj, hoeng “vwnzgwz” dingz doxhoenx daegbied neix, daegbied dwg haujlai ganbu laux deng loengh baenz vunzdig gaihgez, de saedcaih naemj mbouj doeng. Mbangj hungzveibingh caeuq mbangj bouxdaeuz cujciz vunzcungq guh gvaqbouh le, de youh nanz gaemguenj, veiznanz raixcaix.

(caengz sat)

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz